

4. 7956 – Projet de loi autorisant le Gouvernement à acquérir un vélodrome et à participer au financement des travaux nécessaires à la construction des équipements et aménagements nécessaires à son exploitation

Mir kommen dann elo zum Projet de loi 7956 iwwert d'Acquisitioun an d'Finanzéierung vun engem Vélodrom. D'Riedezäit ass nom Basismodell festgeluecht. An d'Wuert huet elo de Rapporteur vun dësem Projet de loi, den honorabele Cyclist Mars Di Bartolomeo.

(Hilarité)

Rapport de la Commission de la Santé et des Sports

M. Mars Di Bartolomeo (LSAP), rapporteur | Merci, Här President. Dir Dammen an Dir Hären, wann ech op d'Tribün kucken an déi richteg Cycliste gesi rondrëm de Laurent Didier, de Fränk Schleck an de Florian Salzinger, Generalsekretär vun der Federatioun, niewent dem Buergermeeschter vu Mondorf, da sinn ech wierklech e klengen Amateur, awer een, deen de Cyclissem vu Kand u schrecklech gär hat a vläicht och Cyclist gi wär, wa mäi Papp en Auto gehat hätt, well dee brauch een definitiv, fir op d'Courssen ze fueren.

Dat gesot, Här President, dës Chamberwoch ass definitiv eng gutt Woch fir de Sport. No der Verbesserung vum Congé sportif an der Verofschidung vum Fënnfjoresplang, kënnst haut de Projet iwwert den nationale Vélodrom drun, deen, mengen ech, net nëmme fir mech eng Häerzensugeleeënheet ass. E steet um Enn vun enger laanger Odyssee an en erfëllt e laangjärege Dram vun eiser Vëloswelt.

De Vélodrom, eng gedeckte Vëlospist, huet eng laang Geschicht an ass och net den éischten, dee mer haten. Virleefer gouf et ab Enn vum 19. Joerhonnert um Glacis, duerno zu Dikrech, duerno um Belair, deen nom éischte Weltkrich gebaut ginn ass an 1952 ofgerappt ginn ass. Schlussendlech huet de Vélodrom zu Nidderkuer 1935 seng Dieren opgemaach. Tëscht senger Ouverture an 1953 hunn hei sëlleg Kompetitiounen stattfonnt. Déi bescht national an international Championen hu sech hei gemooss. Eis gréisst Championen op der Pist waren ouni Zweifel de Lull Gillen, Weltmeeschter, Gewënner vun enger Rei vu Sechstagesrennen mat wiesselende Partner, an d'Elsy Jacobs mat engem änleche Palmarès. Mee och eis aner Toppcoureuren hunn hei trainéiert. 1966 war et domat eriwuer: Déi lescht Kompetitioun huet zu Nidderkuer stattfonnt, an duerno hate mer kee Vélodrom méi.

Wuel ass de Vélodrom duerno nach x-mol a Projeten opgetaucht: als Deel vun der Coque – de Projet gouf ze deier; zu Zéisseng – de Projet gouf net realiséiert. Am ambitiëste war de Projet Kockelarena, dee wuel och e bësse provokativ geduecht war an deen eng richteg Cité des sports op der Kockelscheier mat Liichtathletikpist, Fussballstadion, Vélodrom a munchem méi virgeschloen hat. Leider blouf et bei all deene Projeten – vläicht och ee Grond, firwat e bëssen Demotivatioun opkomm ass. Well allkéiers, wann eng Hoffnung do war a se zerplatzt ass, jo gutt, dann huet een e bëssen de Courage verluer. Et hat een net ëmmer dee Projet am Visiër.

Schlussendlech ass duerno 2010 en Appel à candidature vun der Regierung un d'Gemenge gaangen, fir ze sondéieren, wien interesséiert wier, e Vélodrom op sengem Terrain ze empfänken. Mondorf huet als eenzeg Gemeng de Krittären entsprach, soudass d'Gemeng Mondorf zréckbehalte ginn ass. D'Gemeng wollt awer de Vélodrom an e Projet abannen, dee méi wäit geet an och e Lycée souwéi eng Schwämm mat e puer

Basenge fir d'Schoul an de Public sollt hunn, eng Multisportthal souwisou. An d'Decisioun, de Vélodrom zu Mondorf ze bauen, ass dann den 9. November 2017 am Regierungsrot geholl ginn.

D'Viraarbechten zum Projet hunn d'Ministère Romain Schneider an Dan Kersch gemaach an de Sportminister Georges Engel huet de Projet finaliséiert an elo viru Kuerzem deponéiert. Aus Gespréicher mat eise Championen – ech hat virdu schonn de Fränk Schleck, de Laurent Didier, déi also haut bei eis sinn –, de Vëloexperten a Frënn – dem Petz Lahure an dem Jean Regenwetter – an och dem Initiator vun der sougenannter „Kockelarena“, sinn ech zur Konklusioun komm, dass eist Land mat senger exzeptioneller Vëlostraditioun scho säit Joerzénge hätt missen e gedeckte Vélodrom hunn.

Fir d'éischt emol bitt esou e Bau enorm Trainingsméiglechkeeten am Wanter an d'Coureure brauchen net méi an d'Ausland ze fueere fir ze trainéieren. Bis elo hu se missen op Gent – 250 Kilometer ewech – oder op Stuttgart fueren, fir sou Konditiounen ze fannen. Dat hu se och gemaach. Dat hu se och gemaach, mee dat kann een net eemol d'Woch maachen. Fir d'zweet, an dat ass e ganz wichteg Argument, an dat ass bei jiddwerengem, dee Vëlo fiert, extreem wichteg: Fir d'Finessen op engem Vëlo kënnen ze léieren an domadder eens ze ginn, geet näischt iwwert Trainingsen op der Pist, fir de richtigen Trakt ze fannen, fir den Equiliber ze fannen, fir d'Schnellegkeet ze prouwen, fir d'Haltung ze trainéieren, fir déi bescht Aerodynamik herauszufannen an och taktescht Fueren ze léieren. Hei léieren déi Jonk, ënner anerem hire Vëlo an de Grëff ze kréien, mat extreeme Situatiounen ëmzegoen an am Gläichgewicht ze bleiwen. Dat alles ka sech souwuel am Stroosseverkéier wéi och an engem Peloton nëmme positiv auswirken.

Wat fir e Stellwäert de Vëlossport op der Bunn beispillsweis fir den Internationalen Olympesche Komitee huet, geet eleng aus der Tatsaach ervir, dass d'nächst Joer bei den Olympesche Spiller zu Paräis 12 vun deenen 22 Goldmedailen, déi am Vëlossport ze gewanne sinn, also méi wéi d'Hallschent, op der Pist verdeelt ginn, sechs fir d'Männer, sechs fir d'Fraen. Op der Strooss dergéint gëtt et bei der Olympiad am Ganzen nëmme véiermol Gold: zweemol fir d'Männer, zweemol fir d'Fraen, bei der Course en ligne a beim Contre la montre. Vläicht, wann dann de Vëlossport operationell ass, kënnen zukünftig Toppsportler och eng Kéier um Podium stoe bei Olympesche Spiller a bei Weltmeeschterschaften op der Bunn.

De Vélodrom wäert awer net nëmme fir eng kleng Elitt sinn. Et bitt Avantage bei all Alter, wann ee sech bis mat der Technik – well dat ass eng speziell Technik – erëmfënnt, fir all Trainingsniveau, Sportsniveau, Amateur bis Profi, bis zu Vëlosschoulen. Duerch den Infield am Sportkomplex – wat näischt anescht ass wéi e Meerzweckterrain, deen an dräi ka gedeelt ginn, deen Infield heescht –, mëtten am Vélodrom dran, kann de Vélodrom also als Plaz fir aner Sporteventer an och kulturell Eventer genotzt ginn. Eng Villfalt vu Sportarten kënnen am ganze Komplex praktizéiert ginn, a wat extreem wichteg ass – an dofir ass et och gutt, dass vun de Responsabelen dorop insistéiert ginn ass –, dat ass, dass Synergie gesicht ginn. Déi Synergie spueren net nëmme Geld, mee bréngen och eng nützlich Zesummenaarbecht, eng Vernetzung. Dat ass extreem wichteg.

Mam Gesetzesprojet 7956 gi mer elo der Regierung de Go fir de Finanzement vum Vélodrom. Dee Finanzement däerf 54 Milliounen hors TVA net iwwerschreiden. Gebaut gëtt en, den Dôme, wann een dat emol sou däerf soen, mat enger Pist vun 250 Meter aus Holz – Eedeholz aus dem Norden –, siwe Meter breet,

mat Annexen a Lokaler fir d'Vëlossportfederatioun. Den neien Zentrum, wou d'Gemeng Mondorf Bauhär ass, begräift niewent dem Vélodrom, deen en Deel vun engem grouse Schoul- a Sportkomplex ass, aner Infrastruktur wéi de Lycée, eng Schwämm mat e puer Basengen, eng Multisportthal, déi regional soll agesat ginn, souwéi e Parking, dee fir d'Visiteure vun dem gesamte Komplex zur Verfügung steet. Eng effentlech Plaz ass och dobäi.

De Vélodrom gehéiert dem Staat, deen awer och bei deem Bäileet, wat fir d'Benotze vum Vélodrom noutwenneg ass: d'Energiezentral, d'effentlech Plaz, déi gemeinsam Insel an de Parking. D'Gesetz autoriséiert also d'Regierung, den nationale Vélodrom der Vëlospist, dem Infield, de Lokaler, déi der FSCL zur Verfügung gestallt ginn, an de Gebailechkeeten, déi um Komplex hänken, ze finanzéieren. Wéi virdu gesot, ass de Montant kloer festgesat. De Spuetestéch – dat interesséiert jo jiddwereen –, dee wäert am Hierscht kommen. Wéini dass et fäerdeg ass: Esou séier wéi méiglech, hoffe mer.

An, Här President, Dir Dammen an Dir Hären, den ... Ech si souwisou mat menger Zäit um Enn, brauch och net méi Zäit, well en exzellente Exposé des motifs d'Geschicht vum Lëtzeburger Vëlossport an d'Detailer iwwert de Projet opgezielt huet. D'Avisé kënnst Der noliesen a mengem schréfftleche Rapport. Déi Avisé waren duerchaus positiv. De Conseil d'État huet just op d'Opspléckung vun der Bedeelegung vum Staat gepocht.

Et bleift mir nëmme, Iech Merci ze soen a meng Freed auszudrécken, dass de Lëtzeburger Cyclissem endlech déi Infrastruktur kritt, déi e verdéngt. Et ass eng Reverenz un déi grouss Champions vum Vergaangenheet, et ass e Merci u si, an et ass eng Chance fir déi haiteg an déi nächst Championen. An d'Decisioun fällt just in time, mëtten an enger schwéierer Etapp am Tour de France, wou och e Lëtzeburger d'Hand mat am Spill hat, dass déi Etapp do viru laanger Zäit geschaf ginn ass.

An deem Sënn soen ech Iech en härezeleche Merci an ech si fäerdeg.

M. Fernand Etgen, Président | Ok. An dofir soe mer och dem Här Rapporteur villmools Merci fir säi Rapport.

An den éischten ageschriwwene Riedner ass den honorabelen Här Max Hengel. Här Hengel, Dir hutt d'Wuert.

Discussion générale

M. Max Hengel (CSV) | Merci, Här President. Kollegen a Kolleegeen, Här Minister, léif Fachleit an och de Kollege Steve Reckel vu Mondorf, d'Tatsaach, dass esou vill Leit haut hei sinn, fir dat alles hei vu méi no ze verfullen, weist schonn d'Bedeutung, déi dës Moment haut huet. Merci dem Kollege Mars fir deng Biergetapp vum Rapport, deen s du gemaach hues. Ech fänke virun der Etapp mat engem klengen Ravitaillement un.

M. Mars Di Bartolomeo (LSAP), rapporteur | Du häss sollen e Bidon matbréngen.

M. Max Hengel (CSV) | Jo, ech hu mäi Bidon haut doheem vergiess. Déi hunn d'Kanner all am Gebrauch. Et ass just Waasser.

Endlech ass et souwäit. No 57 Joer könne mer haut erëm de legislative Grondstee leeën, fir e Vélodrom zu Lëtzebuerg ze bauen. Mir als CSV begrëssen dës Projet natierlech a fannen et wichteg, datt mer endlech erëm esou eng Sportinfrastruktur an Zukunft kënnen onse Matbieger zur Verfügung stellen.

De Lëtzebuurger Vëlossport huet Potenzial, wéi en a senger rezenter Vergaangenheet bewisen huet. Wien erënnter sech net gär drun zréck un déi ganz grouss Erfolleger, sief et vun engem Charly Gaul oder de Gebridder Schleck. An ech ka mech och, sou als kleng Anekdot, drun erënneren, als jonke Fraktiounsmataarbechter, sou virun 10, 15 Joer, wann een dann heiansdo mol esou ëm dës Zäit eriwuerkomm ass an d'Chamber, fir engem Deputéierten eppes ze bréngen, da waren ëmmer ganz vill Leit ganz begeeschtert amgaang, d'Daumen ze drécken hei virun der Dier virum Ecran. Dat heescht, och heibannen ass d'Vëlosbegeeschterung schonn ëmmer relativ grouss gewiescht an och d'Deputéiert sinn dann heiansdo séier eraus kucke gaangen, wéi et dann do gaangen ass.

(Interruption)

Jo, oder heiansdo mol méi.

Sou. Awer och haut si mer mat dem Kevin Geniets, Bob Jungels an Alex Kirsch ganz gutt am Tour vertrauen. D'Begeeschterung fir de Vëlossport bleift also ongebrach hei zu Lëtzebuerg. A mat dësem Vëlodrom kënnen mer dann och dem Zil vun der Vëlofederatioun méi gerecht ginn, datt erëm méi Kanner a Jugendliche de Vëlo iwwert d'Vëlospist entdecken an datt se vläicht laangfristeg och deen een oder anere professionelle Coureur op der Pist kann halen.

Zur Geschicht huet de Kolleg Reporter alles gesot, soudatt ech datt kann ewechloossen – meng Zäit leeft och séier of. Ech maache just eng kleng Klammer op: Mir hu jo virgëschter den zwielfte Fënnfjoresprogramm zu de Sportinfrastrukturen hei gestëmmt, a laut dem Exposé des motifs vum Projet de loi zum Vëlodrom ass säit dem aachte Plan quinquennal eng Zomm vun 8,6 Milliounen Euro virgesi fir de Bau vun engem Vëlodrom. Wat wäre mer haut frou, wa mer mat deene Sue géifen dervukommen.

De genauen Historique erspueren ech Iech, wéi gesot, deen ass awer ganz interessant ze liesen. De Reporter huet och drop higewisen an ech kann Iech also den Exposé des motifs als Lektür nëmmen empfielen. Wat wichteg ass ze soen, ass, dass d'Gemeng Munneref de Bauhär ass an datt mir, wa mir dës Projet dann herno stëmmen, der Regierung d'Autorisatioun ginn, de Vëlodrom ze kafen a sech um Finanzement vun den Aarbechte fir den Ekippement an den Aménagement ze bedeelegen.

Zum Projet selwer, ech mengen, de Vëlodrom soll an engem Sportkomplex, inklusiv Piscine a Sportshal, zu Munneref integréiert sinn, inklusiv deene 400 Meterkaree Büeroen fir d'FSCL. Ech mengen, ech hat virgëschter a menger Ried zum Plan quinquennal Sport jo och schonn emol op d'Bedeitung vum Schoulschwammen higewisen an ech mengen, doduerch, datt mer hei elo och eng Piscine integréieren an dës Projet, gëtt also och dësem Bedarf Rechnung gedroen. Och am Oste kënn eng weider Piscine bäi, wat och wichteg ass fir d'Schoulschwammen am Osten.

Et kënn jo och e Lycée bei all dës nei Infrastrukturen derbäi an deen ass och wichteg fir d'Regioun Osten. D'École internationale Mondorf-les-Bains ass jo am Moment schonn a provisoereschen Infrastrukturen ënnerbruecht a gëtt duerno am Lycée integréiert. An et ass also eng weider sënnavoll Synergie am Kader vun dësem ganze Projet, wat eebe positiv an nohalteg ass.

Mengen Informatiounen no ass et awer esou, datt net all d'Terrainen, op deenen de Lycée herno soll stoen, dem Staat gehéieren, dofir wollt ech de Minister froen, ob hie vläicht weess, ob dat nach ëmmer esou ass oder ob et do mëttlerweil Nouvellé gëtt. Wichteg ass dann, wann alles bis en place ass, datt nieft dem Schoultransport Richtung Lycée och den

ëffentlechen Transport bis op de Site gutt organiséiert gëtt. Ech denken, d'FSCL wäert jo do fir hir Nowuessathleeten den Transport organiséieren, mee esou eng national Infrastruktur brauch och e gudden ëffentlechen Transport fir dohinner, fir datt alleguer d'Leit, déi wëllen op de Site kommen, och gutt ugebonne sinn. Den Osten ass jo vu senger geografescher Beschafenheet scho relativ speziell, esou eng laang Strull, dat heescht, vun Iechternach bis op Munneref ass et scho relativ wäit; wann ee sech da virstellt, wann ee vu Wolz oder Veiane muss dohinner kommen, muss also den Transport gutt dohinner assuréiert sinn.

Och den Iwwerbléck zum Vëlodrom selwer erspueren ech Iech a mir. Ech wëll kuerz just op den Avis vum COSL agoen, deen de Projet natierlech och begréisst, awer bedauert, datt keng Installatiounen fir d'Medie virgesi sinn. Dowéinst meng Fro un de Minister, ob eventuell awer ugeduecht ass, nach esou mat anzeplangen.

Dann een allerleschte Punkt, deen nach ze nenne bleift: Dëst ass elo de Projet de loi zum Bau respektiv Finanzement vun den Infrastrukturen, mir hunn awer net iwwert de Fonctionnement geschwat. Dofir wollt ech froen: Wéi e Modell ass do eventuell ugeduecht? Mir kéinten eis do zum Beispill en Établissement public virstellen.

Ceci dit, soen ech Iech Merci fir d'Nolauschteren a ginn den Accord vun der CSV-Fraktioun. Merci.

M. Fernand Etgen, Président | Merci villmools, Här Hengel. An den nächsten ageschriwwene Riedner ass déi honorabel Madamm Carole Hartmann. Madamm Hartmann, Dir hutt d'Wuert.

Mme Carole Hartmann (DP) | Merci, Här Präsident. Léif Kolleeginnen a Kollegen, d'Nimm Schleck, Kirchen, Didier, awer och Jungels sinn alle Lëtzebuurger e Begrëff, Nimm, déi am internationale Vëlossport, op der Weltbühn vum Vëlossport iwwert déi lescht Joren an och aktuell bekannt sinn an déi mat hire Performancen eng formidabel Reklam fir d'Lëtzebuurger Land ronderëm d'ganz Welt maachen a gemaach hunn. Dat ass Nation Branding par excellence.

Ech denken hei ënner anerem – a se sinn haut nach net genannt ginn – un dem Andy Schleck seng Victoire beim Tour de France 2010, de Gebridder Schleck hire Podium 2011 beim Tour de France, dem Bob Jungels seng Deeg am rosae Maillot beim Giro d'Italia 2017, dem Kim Kirchen seng Maillot-jaunen a Maillot-verten am Tour de France 2008, awer och Etapevictorien am Tour de France, am Tour d'Espagne, am Tour d'Italie souwéi beim Amstel Gold Race, Léck–Baaschtnech–Léck an der Flèche Wallonne – aussergewöhnlech Leeschtungen vu Lëtzebuurger Cyclisten, déi op Éiwegkeeten als historesch sportlech Momenter an der Lëtzebuurger Sportgeschichte wäerte bestoe bleiwen.

Här President, Lëtzebuerg huet zanter ville Joren – Joréngten! – eng Vëloskultur, Vëlosgeschicht, jo, Lëtzebuerg ass e vëlosbegeeschtert Land. Nieft de fréiere grouse Vedetté François Faber, Nicolas Frantz, Charly Gaul an den Nimm, déi ech och elo just scho genannt hunn, dierfe mer beim Lëtzebuurger Vëlossport awer net déi sëlleg Nowuessatalenter vergiessen, déi aktuell national wéi international ënner Kontrakt stinn. Och hei am Land erfreet sech de Vëlossport nach ëmmer engem groussen Interessi. Dat huet een net méi spët wéi virun zwou Wochen op den nationale Meeschterschaften zu Berbuerg gesinn, wou an alle Kategorien, vun Débutants bis Masters, ganz vill Leit op de Start-lëscht vertraude waren.

Firwat soen ech datt hei op dëser Plaz? Ganz einfach: De Projet de loi, dee mer haut stëmmen, ass en Invest an d'Zukunft vum Lëtzebuurger Sport, en Invest an de Lëtzebuurger Vëlossport vun haut, awer och vu muer. Mam Bau vum Vëlodrom erméigleche mir der FSCL, de

lokale Vëlosveräiner a senge Coureuren, Professionelle wéi awer och Amateuren, vu Jonk bis manner Jonk, eng modern an adequat Infrastruktur, fir och bei schlechtem Wieder ënner ideale Konditiounen kënnen ze trainéieren. Et gëtt keng Verkéiersbeurteilungen, soudass d'Cycliste sech zu 100 % op hiren Training, wéi zum Beispill d'Taktik, d'Technik an d'Fueren an engem Grupp fokusséieren kënnen. Dës Trainingsméiglechkeeten déngen zumools bei der Jugend, fir d'Basis um Vëlofuere méi no ze bréngen.

Nodeems den éischte Projet vum Vëlodrom 2006 aus finanzielle Grënn zu Zéisseng verworf gouf, konnt d'Gemeng Munneref sech beim Appel à candidature duerchsetzen; d'Gemeng Munneref, déi proaktiv reagiert huet, divers Terrainen opkaaft huet a rezent och schonn eng Baugeneemegung ausgestallt huet an dann och als Bauträger vun dësem Projet wäert fungéieren. Merci dofir och dem Buergermeeschter Steve Reckel fir seng Presenz hei a fir déi vereinfacht, pragmatesch Approche, fir dës Sportkomplex schnellstméiglech fäerdegstellen.

Nom Ofschloss vun den Aarbechte ginn de Vëlodrom an d'Büroen un de Staat verpaid, deen dës Infrastrukturen dann der FSCL als Haaptstéig zur Verfügung stellt. Wichteg ze ernimmen ass op dëser Plaz, dass de ganze Komplex, wou de Vëlodrom hikënn, nach eng ganz Panoplie un anere Méiglechkeete bitt. Et ass e Komplex, deen zukünftig der ganzer Gemeng Munneref, jo, der ganzer Géigend zeguttkënn. Nieft dem Vëlodrom wäerten nämlech an Zukunft och e Lycée an direkter Émgéigend, eng Kloterwand, eng Brasserie, eng Hal an eng Piscine mat méi Bassengen fir de Public an d'Schoulen entstoen. Et handelt sech deemno och ëm e Projet, deen un de Breedessport denkt, deen un d'Promotioun vun der touristescher Offer am ländleche Raum an am Osten denkt. E weidere wichtige Projet, deen dem Lëtzebuurger Tourismus zeguttkënn an d'Attraktivitéit vun der ganzer Regioun, dem ganzen Osten, weider stärkt.

Här President, de Vott vum Projet de loi ass e grouse Moment fir de Lëtzebuurger Vëlossport. Mir investéieren an de Sport, an den Tourismus an an d'Attraktivitéit vum Osten, awer och vun ganze Land. Eng kloer Win-win-Situatioun – mat Freed ginn ech dowéinst och hei den Accord vun der DP-Fraktioun.

Merci.

Plusieurs voix | Très bien!

M. Fernand Etgen, Président | Merci villmools, Madamm Hartmann. An den nächsten ageschriwwene Riedner ass déi honorabel Madamm Chantal Gary. Madamm Gary, Dir hutt d'Wuert.

Mme Chantal Gary (déi gréng) | Här President, Kolleeginnen a Kollegen, léif Visiteuren heibannen, Här Minister, de Vëlossport huet eng laang a virun allem awer och eng remarkabel an erfollegräich Geschicht zu Lëtzebuerg. Vill Nimm si scho gefall: Nicolas Frantz, Elsy Jacobs, Charly Gaul, Bim Diederich, Kim Kirchen, natierlech d'Schleck-Bridder, awer och ganz aktuell Christine Majerus, Bob Jungels, Anne-Sophie Harsch oder Alex Kirsch – alles grouss Nimm, déi zum Nation Branding bäidroen, Ambassdréien an Ambassadeuren vum Lëtzebuurger Land, déi natierlech och Virbiller sinn, Virbiller vu ville Jonken, an duerch déi Loscht a Motivatioun entsteet, och op de Vëlossport ze kommen.

D'Vëloscommunautéit an déi potenziell Vëloscommunautéit hei zu Lëtzebuerg ass also ferm um Klammen. A mir wëlle jo eng sportlech Bevëlkerung a mir ënnerstëtze Jonker, déi Sport maache wëllen. Also muss mer och eist Beschtméiglecht maachen, fir hinnen e passende Kader ze bidden. A genau dat

geschitt elo mam Bau vun dësem – scho laang an der Diskussioun – Vëlodrom zu Munneref.

Här President, nach dës Woch sinn ech hei op der Tribün op déi verschidde Virdeeler vu flotten, prakteschen, héichwäertege Sportinfrastrukturen agaan-gen.

Ekonomesch Virdeeler: De Bau vun engem Vëlodrom zu Munneref kann derzou bäidroen, datt d'Stad als Austragungsort vun internationale Kompetitiounen ausgewielt gëtt, wat Touristen, Athleeten an Athleetinnen an natierlech och eng gewësse Medienopmierksamkeet mat sech bréngt. Dat alles steigert d'Attraktivitéit vun der Stad Munneref an natierlech och vun der ganzer Region. Oder awer de Sport-tourismus, Vëlobegeeschterter, déi hir Vakanz extra zu Lëtzebuerg maachen, well se d'Erlebnis Vëlodrom materliewe wëllen.

Sportlech Virdeeler: Wéi virdu scho gesot, geet et hei och drëm, fir dem Besoin um Terrain gerecht ze ginn. E Vëlodrom kann nämlech souwuel vu Profien, Amateure wéi och vu Fräizäitfuere a -fuereerinne benotzt ginn. E schafft e sécheren a spezialiséierten Environnement fir d'Sportler an d'Sportlerinnen an d'Infrastruktur kann ouni Bedenken dat ganz Joer iwwer genotzt ginn. An natierlech ass dëst och eng direkt Ënnerstëtzung vum Vëlosport a fërdert nei Talenter, déi mat Houfert eist Ländchen op internationale Kompetitiounen vertriecht wäerten.

Da ass am Kader vun enger Sportsdiskussioun, wou et ëm d'Virdeeler geet, natierlech och net ze vergies-sen, déi gesondheetlech Virdeeler, déi de Sport, déi kierperlech Betäitegung mat sech bréngt, souwéi och eng besser Liewensqualitéit ze erwänen.

Kloer ass e Vëlodrom net ze vergläiche mam Vëlofue-ren dobaussen an der frëscher Loft, am Fräien, am Bësch, mee dorëms geet et hei och guer net. Et geet drëm, eng erweidert Trainingsméiglechkeet ze schafen, eng wäertvoll Ergänzung vum Vëlossport, déi aner Virdeeler mat sech bréngt, wéi eeben déi ganzjäreg Notzung, spezifeschen Training, Leeschtungsoptimie-rung oder och konstant a previsibel Fuerkonditiounen.

Här President, ech géif gär nach eemol op een Numm zrëckkommen, deem ech virdu bei menger Oplëschtung vu bekannte Lëtzebuurger Vëlosportler a -sportlerinnen erimmt hunn, an zwar d'Elsy Jacobs. Eng Fra, déi Geschicht geschriwwen huet fir Lëtze-buerg. Eng Pionéierin am Fraevëlosport. Eng Fra, déi bis 1955 keng Courssen hei am Land huet dierfe fue-ren, well d'Statutten dat net virgesinn hunn, dann 1958 bei der Weltmeeschterschaft untrëtt – a gewënnt!

Plusieurs voix | Très bien!

Mme Chantal Gary (déi gréng) | Duerch d'Elsy Jacobs huet de Vëlosport hei zu Lëtzebuerg e ganz neie Stelleväert kritt a si huet virun allem vill jonk Fraen inspiréiert an hinne Courage gemaach. Ech si lo bewosst nach eemol op dës Ikon, op dës spezifesche Personnage agaan, well wann een op eise Site „Luxembourg – Let's make it happen“ geet, wou eng Opzielung vun historiesche Lëtzebuurger Vëlosportler a -sportlerinnen ass, steet néierens den Numm Elsy Jacobs, wat menger Meinung no e Feeler ass a rekti-fizéiert misst ginn.

Plusieurs voix | Très bien!

Mme Chantal Gary (déi gréng) | Här President, nieft den ëmmer nach ganz groussen Defiziter am Vëlosport tëscht Fraen a Männer, sief et, wat d'Bezuelung ugeet oder wann et ëm divers Course geet, wier et flott, wann de Vëlodrom, iwwert dee mer haut hei schwätzen, eng Virbildfunktoun anhuele géif a fir gläich-wäerteg Chancé fir Fraen a Männer am Vëlosport géif stoen.

Une voix | Très bien!

Mme Chantal Gary (déi gréng) | Nieft dem Bau vum Vëlodrom, wéi scho vu menge Virriedner a Virriedne-rinne gesot, gëtt hei e ganze Sportkomplex gebaut. Et kënnt e Sportsterrain an d'Mëtt vum Vëlodrom, eng regional Multisportshal gëtt gebaut, eng regional Schwämm gëtt gebaut, souwéi en neie Lycée, alles, wéi gesot, fir dem aktuelle Besoin um Terrain gerecht ze ginn an ze anticipéieren.

Da géif ech gär en ofschrëissen, andeems ech dem Här Rapporteur nach e grouse Merci fir de schrëftlechen an detailléierte mëndleche Rapport soen. Ech soen Iech Merci fir d'Nolauschteren an ech gi mat Freed den Ac-cord vun der grénge Fraktioun fir dës Projet de loi. Merci.

Plusieurs voix | Très bien!

M. Fernand Etgen, Président | Merci villmools, Ma-damm Gary. An da geet d'Wuert un den honorabelen Här Jeff Engelen. Här Engelen, Dir hutt d'Wuert.

M. Jeff Engelen (ADR) | Merci, Här President. Léif Kolleegeinnen a Kolleegeen, och Léif Gäst aus dem Cyclissem: en härezeche Wëllkomm. Ech wëll, fir unzefänken – net dass ech et vergiessen –, dem Mars Di Bartolomeo en härezeche Merci soe fir säi schrëft-lechen a mëndleche Rapport.

De Cyclissem huet zu Lëtzebuerg e groussen Histori-que an international si grouss Meritter ze verzechnen, dëst op der Bunn wéi och op der Strooss a wéi och am Cyclocross. Alles dat soll een net vergiessen. An ech mengen, déi grouss Sportler goufe schonn hei erwänt, dofir wëll ech dat elo net maachen. Mee et muss een awer och soen, de Cyclissem ass am ganze Land, speziell d'Courssen, nach ëmmer ganz beléift. Et ass egal, wou ee wunnt, et fënnt een iwwerall grouss Zoustëmmung.

Bis 1966 war e Vëlodrom zu Nidderkuer, du kouw quasi 40 Joer Stëllstand an deem Dossier. 2006 sollt dann zu Zeisseng e Vëlodrom gebaut ginn, wat awer leider net realiséiert gouf. Am Joer 2010 huet dunn d'Regierung en Opruff gemaach, fir deem dann ze bauen, an d'Gemeng Munneref huet sech gemellt, leider Gottes déi eenzeg, mee ëmmerhin, et ass eng, an ech sinn och frou, datt et esou ass. An den 9. No-vember 2017 huet de Regierungsrot dann och den Ac-cord ginn, fir dat ze bauen. D'Gemeng ass Bauhär mat weideren Infrastrukturen an deem Kader, wéi Lycée, Sportshal, Schwämm, Vëlodrom a sou weider. De Staat bedeelegt sech um Bau vum Vëlodrom an och vun een-zelne Saache ronderëm.

Domat ginn dann nei Trainingsméiglechkeete gescha-fen, eenzel Techniken kënnen untrainéiert ginn an dëst ass dann och wiederonfhängeg. Net ze vergiessen, datt dëst dann och e regionale Projet ass a mer domat eis touristesch Offerte vergréisseren, an och d'Attrak-tivitéit vum Land gëtt vill méi grouss no bausse ge-droen.

Ech géif dann zum Schluss vläicht e Verglach maachen: En ass vläicht net grad glécklech, mee ech denken do un d'Fussballschool, déi mer geschafen hu virun 20, 30 Joer. Wann een déi Meritte kuckt, déi d'Fussballschool geschafen huet, bis bei déi, wou de Fussball haut steet, géif ech dann dem Vëlo déi selwecht Meritte wën-schen, dee selwechten Erfolleg. Ech mengen, ech er-liewen et warscheinlech net méi, mee da kéimen nach op de Vëlo, op de Cyclissem heizuland groussaarteg Zäiten zou.

A well dat esou ass, ginn ech d'Zoustëmmung vun der ADR zu dësem Gesetz. Ech soen Iech Merci fir Är Op-mierksamkeet.

Plusieurs voix | Très bien!

M. Fernand Etgen, Président | Merci villmools, Här Engelen. An ech ginn d'Wuert weider un déi honorabel Madamm Nathalie Oberweis. Madamm Oberweis, Dir hutt d'Wuert.

Mme Nathalie Oberweis (déi Lénk) | Merci, Här Pre-sident. Och merci dem Rapporteur fir dës Rapport, an ech mengen, mir hunn an der Lescht vill iwwer Sport hei geschwat an iwwert d'Avantagen an d'Virdeeler vum Sport fir d'Gesondheet, mee och fir d'Zesummelie-ven an der Gesellschaft.

An deem Sënn begrësse mir natierlech, dass de Vëlo-drom elo endlech eng Realitéit gëtt, nodeems dës Projet säit Joren am Gespréich war. Wann e bis fäerdeg-gestallt gëtt, wäerte viraussichtlech 60 Joer vergaange sinn, an deenen et zu Lëtzebuerg keng Infrastruktur gouf, an där d'Cyclisten och an der naasser a kaler Jo-reszäit ënner professionellen a séchere Bedéngunge konnten trainéieren an och Kompetitiounen ausféie-ren.

Den Exposé vum Gesetzesprojet geet jo och op déi laang a markéiert Geschicht vum Lëtzebuurger Cyclis-sem an. De Cyclissem ass sécherlech eng, wann net déi beléifte Sportart hei zu Lëtzebuerg, engersäits ëmmer ërëm, well e mat un der Weltpéit ass an dat, säit dës Sport professionell gemaach gëtt respektiv welt-wäit vill Opmierksamkeet kritt. An et ass anerersäits awer och eng vun den demokrateschte Sportarten, déi fir déi allermeescht praktikabel ass, onofhängeg, plus ou moins onofhängeg vum Budget, vum Fitness-stand oder och vum Alter.

Mat den Elektrovëloen huet sech de Vëlo nach weider zu enger beléifter Sportart entwéckelt, ob een dat elo praktizéiert oder net. Egal, ob ee selwer mam Course-vëlo, mam Mountainbike duerch d'Bëscher fiert, mat engem méi bequeme Vëlo kleng Tier um Weekend mécht, sou wéi ech, oder ob een am Alldag säin Trajet mam Vëlo mécht – fir jiddwereen ass eppes derbäi.

An deem Sënn ass de Vëlodrom also eng Infrastruk-tur, déi sécherlech och vun enger breeder Bewee-gung an eiser Gesellschaft an och am Cyclissem matgedroen a matënnerstëtz gëtt. Mir hoffe just, dass nieft dem Bau vun dësem Vëlodrom och weider d'Efforte verstärkt ginn, fir d'Stroosse méi sécher ze maache fir d'Vëlosfuere, eeben déi vill Vëlospisten, déi ëmmer nach net zesummenhängend si bei eis am Land, deelweis net fäerdeggestallt sinn oder an engem schlechten Zoustand sinn an och net ëmmer ofgeséichert an zum Deel och geféierlech sinn.

Villmools merci.

M. Fernand Etgen, Président | Merci villmools, Madamm Oberweis. An de leschten ageschriwwene Riedner ass den honorabelen Här Sven Clement.

M. Sven Clement (Piraten) | Merci, Här President. Léif Kolleegeinnen a Kolleegeen, als Éischt e grouse Merci un de Rapporteur fir de gudden mëndlechen a schrëftleche Rapport. Et ass natierlech ëmmer flott ze gesinn, datt e Projet awer och e gewëssenen Interêt generéiert, datt d'Leit bis an d'Stad kucke kommen an net nëmme virun der Télee kucken, esou wéi ganz vill vun eis dat beim Tour de France maachen an dat da virun der Télee kucken – Presence an der Chamber oblige!

Ech kéint elo soen, datt ee ganz vill Guddes um Vëlo-drom kann aussetzen, an ech mengen, dat gouf vun all menge Virriedner a Virriednerinne gesot. Ech kéint also nach eng weider Lobeshymn drop schwätzen a sangen, dass mer elo 60 Joer gebraucht hunn, fir hei ërëm widerzekommen. Ech kucken awer deem Projet och e bësse mat gemëschter Gefiller entgéint. Keng Angscht, mir wäerten en herno matstëmmen, mee erlaabt mer awer zumindest, e puer Froen

opzwerfen. Net, well ee géint e Vélodrom wier – ech mengen, dat Wichteg ass, all Sportaart déi adequat Infrastrukturen ze ginn –, mee wien den Exposé des motifs liest an och dem Rapporter nogelasschert huet, dee weess jo e bëssen, dass de Werdegang vun deem Projet e bëssen, ech sinn elo fein a soen, „mouvementéiert“ war. Sou.

Den éischte Punkt ass natierlech: Wann et esou mouvementéiert ass, heescht dat, datt et laang gedauert huet. An ech mengen, mir hätten hei e bësse méi séier kënne virukommen. An ech erënneren einfach emol un de Projet zu Zeisseng. Dee Projet sollt ronn zwielef Milliounen Euro kaschten. Zwielef! An en ass falegelooss ginn, well et deemools wirtschaftlech net esou super war, d'Situatioun war e bësse schwierig an dunn huet ee gesot: „Zwielef Milliounen, dat ass ze vill, et ass ze deier, mir kënnen dat net finanzéieren“, an du gouf et net gemaach. An dat ass e bëssen ironesch, wann ee bedenkt, datt, wa mer et deemools fir zwielef Milliounen gebaut hätten, mer et haut net missten ...

(Interruption)

Estiméiert, jo.

Da misste mer elo net iwwert deen heite Projet an iwwert déi haiteg Käschte schwätzen. D'Envergure vum Projet haut ass och e gutt Stéck méi grouss an dofir ass et och, mengen ech, richtig, datt mer et gemaach hunn.

Du gouf et op eemol de Projet vun där Kockelarena, och vun där gouf scho geschwat, wou ee viles hätt kënne fusionéieren. Ech si ganz éierlech, ech hätt eng gewëss Sympathie gehat, wann ee Lichtathletik, Vélodrom a weideres hätt kënne fusionéieren. Ech halen dee Projet awer, Stand haut, nach ëmmer fir eppes, wat gutt um Pabeier geklungen huet, awer an der Realitéit schwéier mat Liewen ze féile gewiescht wier. E wier awer besser ugebonne gewiescht an – ech mengen, dat huet de Max Hengel virdun zurecht gesot – et geet hei och drëm, datt mer d'Sportlerinnen an d'Sportler elo dohinner kréien.

An dann den zweete Problem ... oder net Problem, sou soll een et net nennen, mee dee Punkt, wou ech awer liicht Bauchwéi hunn, dat ass, datt mer d'Infrastrukture fir d'Lichtathletik aus deem heite Gesetzesprojet erausgeholl hunn an an engem zweete Projet maachen, anstatt datt mer et hätte kënnen an engem Coup maachen. Dat ass ok. Ech hätt mer gewënscht ... Mir schwätze jo driwwer, wat an dem Banneberäich vum Vélodrom geschitt, déi dräi Sportterrainen, déi Multisportsurfacen. Ech hätt mer gewënscht, wa mer am Virfeld do e bësse méi am Detail ..., datt mer alles schonn hei an deem Projet hätten. Ech weess awer, firwat dat esou ass, ech kann och ganz gutt domadder liewen.

An ech sinn och frou – an dat wëll ech dann awer positiv soen, ech wëll elo hei net nëmmen negativ klängen –, et soll ee positiv soen: Am Émkrees vun 250 Kilometer wäert ee keng vergläichbar Infrastruktur fannen. Dat ass e Lichttuerm fir de Lëtzeburger Sport. Wann eis Sportlerinnen a Sportler um Vëlo, am Suedel, net scho Lichttuermfunktioun genuch hätte fir de Lëtzeburger Vëlossport, da wäert dee Vélodrom op alle Fall derfir suergen, datt et nach e bësse méi hell liicht. An deementspreechend sinn ech ganz frou, datt mer dee Projet haut kënne stëmmen, och wann en dann nëmmen 1.000 Leit op der Tribün huet a keng 2.500.

Ech soen Iech Merci.

M. Marc Goergen (Piraten) | Ganz gutt!

M. Fernand Etgen, Président | Merci villmools, Här Clement.

D'Regierung huet d'Wuert, den Här Sportminister Georges Engel. Här Engel, Dir hutt d'Wuert.

Prise de position du Gouvernement

M. Georges Engel, Ministre des Sports | Merci, Här President. Léif Kolleegen a Kolleeginnen Deputéiert, léif Cyclisten op der Tribün, léiwe Frënd Buergermeeschter, fir d'éischt wëllt ech ufänke mat engem grouse Merci un de Rapporten vun deem Gesetz fir säi mëndlechen a schrëftlechen Rapport.

Jo, mir haten eng gutt Woch, sou huet de Rapport och gesot, eng gutt Woch fir de Sport. Mir haten u sech zwou gutt Woche fir de Sport schonn, d'Gesetz vum INAPS ass gestëmmt ginn, duerno dat vum Congé sportif, dat vun den Infrastrukture fir déi nächst fënnf Joer an haut dann – wann ech dat esou richtig matkritt hunn – de Vélodrom, an dat och à l'unanimité. Alleguer déi aner Projekte virdru waren och à l'unanimité. Also e staarkt Bekenntnis vun deem Haus fir de Sport.

A mir hunn en Dënschde gesot: Sportinfrastrukture sinn natierlech e wichtige Bestanddeel vun eiser Sportphilosophie „Lëtzebuerg leeft Sport“, an dat hei ass natierlech en Élément-clé vun der ganzer Politick. Et ass e laang erwaarte Projet an ech si ganz frou, datt mer haut dann d'Finanzéierungsgesetz fir de Vélodrom kënne stëmmen.

De Vëlo a Lëtzebuerg, jo, dat ass eng Geschicht, déi geet ganz gutt zesummen zënter ganz, ganz laanger Zäit, an et ass virdru gesot ginn: Vill Helden, géif ech sou mol soen, hunn duerch hir Exploite Lëtzebuerg wirklech un d'Spëtzt vum Sport weltwäit gesat a mir sinn allegueren immens houfreg op si. Mee de Vëlo ass zu Lëtzebuerg net nëmme Vëloprofisport. De Vëlo ass mëttlerweil am Alldag ganz present, an och do kann dann de Bau vum Vélodrom sécherlech säin Deel bäidroen.

An zënter dem Verschwanne vum Nidderkuerer Vélodrom 1966 hunn d'Lëtzeburger Vëlosfuere sech ganz staarkgemaach fir eng nei Indoorstreck, déi dann net nëmmen d'Ausbildung vun erfollegräichen Athlete soll erlaben, mee och d'Ausbildung vu ville Jonken, déi eng Kéier vläicht de Wee fannen an de Profisberäich, mee awer och vun deenen, déi en net dohinner fannen. An ech ginn net méi op den Historique an, dat ass genuch gemaach ginn. Ech wëllt awer hei och e grouse Merci un d'Gemeng Mondorf soen, déi déi eenzeg Gemeng war, déi 2010 dem Appell vum Romain Schneider nokomm ass a sech fir dee Projet hei gemellt huet.

D'Gemeng Munneref huet awer zousätzlech de Wonsch do ausgedréckt, datt esou eng Infrastruktur vun nationaler Natur am Kader vun engem gréisseren Projet mat engem Lycée, enger Indoorschwämm fir Schoulkanner, fir d'Schoul am allgemengen a fir déi öffentlech Bedürfnisse wéi och engem Sportzenter sollt duerchgefuert ginn. A schlussendlech ass dunn den 9. November 2017 d'Decisioun vun der Regierung geholl ginn, fir eben de Vélodrom zu Mondorf ze realiséieren. Deemools gouf festgehalen, datt de Projet zu 70 % vum Staat géif subsidiéiert ginn. Dunn huet d'Gemeng Munneref ugefaangen ze schaffen, Concours d'architecte a Planung, en Ingenieursbüro erausgesicht, et gouf eng ganz laang Prozedur gestart an et gouf och ganz vill geschafft.

An den Depot vum Gesetz, dee war den 19. Januar 2022. Et war den éischte Projet de loi, deen ech als Minister konnt deposéieren. Et gouf do festgehalen, dass d'Gemeng Munneref wuel Bauhär géif bleiwen, mee dass de Staat dann awer Proprietär vum Vélodrom mat dem Infield géif ginn. An ech kommen herno och eng Kéier kuerz op den Infield ze schwätzen. Hei muss ee bemerken, datt dat e ganz

spezifesch Projet ass mat enger grousser Envergure an datt d'Gemeng Munneref de Bauhär bleift, datt eng ganz Rei vu Synergie geschafe ginn, datt nieft dem Vélodrom dann och déi Schwämm kënnt, dee Sportskomplex dohinner kënnt, dass dat alles zesumme vill méi eng rationell Budgetiséierung mécht, eng besser Planung fir den Architect mécht an och déi ënnerschiddlech Phase vum Bau hei besser kënne koordinéiert ginn.

D'Finanzéierungsgesetz beleeft sech op ronn 54,5 Milliounen a mir haten déi och schonn op dem ee-leften ... oder op dem aachten, dem néngten, dem zéngten an dem eelefte Fënnfjoresplang. An do ass du festgehalen ginn, datt 41,6 Milliounen iwwert de Budget vum Finanzministère lafen, déi dann de Vélodrom ganz kafen, an déi 12,9 Milliounen iwwert de Fonds d'équipement sportif. Dat sinn dann déi aner Ekippeementer, déi musse gemaach ginn, Aménagement, déi derzou gehéieren, d'Energiezentral, d'Place publique an och déi gemeinsam Strukturen. Dofir hu mer eng Derogatioun gefrot, dat ass och alles gutt gaangen.

En nationale Vélodrom, deen erlaabt natierlech Training onofhängeg vun de Wiederkonditiounen, d'Technik kann ee vill besser léieren, sech ze placéieren an der Course, den Untrëtt trainéieren an d'Explosivitéit, d'Taktik an d'Wandschiefueren. Also alles dat si grouss Virdeeler. An an all Gespréich mat all Vëloprofi an Netprofi huet een héieren, dass dat eng absolutt Plus-value ass, wa mer dee Vélodrom heihinner kréien. An et gëtt och eng ganz Rei vun neien Disziplinen, déi et méiglech maachen, dass mer Olympionike kënne kréien a vläicht och déi eng oder aner Medail.

Den zukünftege Vélodrom, deen huet awer och de Virdeel, en Infield ze hunn, an ech wëll eng Kéier kuerz dorobber agoen. Dat ass déi Plaz am Rank bannendra vum Vélodrom, dat sinn dräi grouss Halenterrainen, ee bësse méi e klengen Terrain, an nach eng Kéier d'Kappdeeler – also wou ee fënnf verschidde Méiglechkeeten huet, fir déi ze notzen. Déi wäerten dann och vum Lycée genotzt ginn, wann deen dann eng Kéier dohinner kënnt. An déi kënnen och fir grouss Sportevenementer genotzt ginn an och fir kulturell Evenementer à la rigueur genotzt ginn. Dofir, dat ass eng ganz multifunktionell Plaz, déi eis vill Méiglechkeeten opléisst. De Projet ass deemno u sech vill méi wéi e Vélodrom. Et ass e ganze Sportskomplex mat ganz ville Synergien.

Et ass awer och e Meilesteen, géif ech soen, an dem Lëtzeburger Sport, dee mer haut hei kënne stëmmen. Dofir e grouse Merci un d'Gemeng Mondorf, datt se sech gemellt huet, fir iwwerhaupt dee Vélodrom ze kréien. Merci och un alleguer déi fréier Ministeren, déi ganz vill un deem Projet hei geschafft hunn, un d'Verwaltungen, un d'Vëlofederatioun an un alleguer déi, déi un de Projet hei gegleeft hunn. Well et waren der eng Rei, déi net méi doru gegleeft hunn, well et schonn esou laang gedauert huet, dass en elo endlech kéint Realitéit ginn.

Dee Projet hei, deen huet vill Pappen an ech si frou, datt ech een dovunner duerf sinn. A Steve, ech hu mäi Versprieche gehalen: Mir kënnen déi Fläsch Cremant do knacken, et ass eng Cuvée „Julie“, ech si ganz frou doriwwer. An ech sinn och ganz frou, dass mer haut hei e groussen Accord fanne fir dese Projet.

Vläicht dann och op déi ...

(Interruption par M. Sven Clement)

Mme Myriam Cecchetti (déi Lénk) | A mir dann?

M. Georges Engel, Ministre des Sports | Natierlech, Dir wäert e jo stëmmen. Da soen ech Iech natierlech och allegueren e grouse Merci. Et ass eng Fläsch

Cremant. Bon, mir kënnen déi och zu 60, zu 62 deelen, dann ...

(Hilarité)

M. Sven Clement (Piraten) | Eng Fläsch fir 60, dat gëtt just!

Une voix | Mir halen dorobber!

(Coups de cloche de la présidence)

M. Georges Engel, Ministre des Sports | Et ass gutt, da kritt Dir och eng Schlupp dovunner.

Fir vläicht nach op déi eenzel Froe kuerz anzegoen, déi gestallt goufen. De Max Hengel huet gefrot, wat d'Terraine vum Lycée ugeet. Dat gehéiert net zu deem heite Projet de loi, dat ass kloer. Do si se och nach net all kaaft, mee et ass awer elo ze fréi, fir do scho méi ze soen. Mee et ass an den Diskussiounen, datt mer déi Terrainen do alleguerste solle kréien.

Wat d'Medieraim ugeet, ass et esou, dass do och eng Mezzanine gebaut gëtt, wou u sech d'Jugé sëtzen, wou awer och Plaz ass, fir datt do och d'Medie sech kënnen ophalen, fir alles ze verfolge. An et gëtt och nach eng Rei Nieweraim, déi dann och accessibel si fir d'Medien. A wann eng Kéier eng ganz grouss Manifestatioun do sollt hin, do ass och mat der UCI scho geschwat ginn an da wär et esou, dass d'Sportshal, déi nienwdrun ass, kéint fräigemaach ginn, fir do e grousst Medienzenter dann och ze maachen.

Wat de Fonctionnement ugeet, do ass nach keng definitiv Decisioun geholl. Bon, et gëtt vill Méiglechkeeten. Dir hutt vun engem Établissement public geschwat, et gëtt awer och d'Méiglechkeet, dat an den INS ze integréieren als eng enk Struktur, déi da vun der Administration des infrastructures nationales du sport géif geréiert ginn. Et ass nach keng Decisioun geholl, mir sinn nach amgaangen, dorunner ze schaffen.

Vläicht zu der Madamm Hartmann, well ech hat se vläicht falsch verstan. Do komme Raimlechkeete fir d'Federatioun hin, mee de Vélodrom ass net der Federatioun hiren. Net, datt ech dat falsch verstanen hat. Hat Der dat net esou gesot? Et ass net, datt ...

Mme Carole Hartmann (DP) | Et ass dem Staat säin.

M. Georges Engel, Ministre des Sports | Jo, et ass dem Staat säin, voilà, an d'Federatioun kritt Raimlechkeeten do, fir hir Aarbecht ze maachen. Ech wollt dat just kloerstellen.

Da mengen ech och, datt ee soll um Site – „Let's make it happen“ – och d'Madamm Elsy Jacobs, eng vun eisen, jo, Beschten, eng vun de Beschten op der Welt, sollt och ernimmen.

Voilà, zum Infeld hunn ech eppes gesot, wat ech dem Här Clement wollt äntweren.

Dofir, e grouse Merci Iech allegueren, wann Der dat heite stëmmt. Eng gutt Woch fir de Lëtzebuerger Sport! Merci.

Plusieurs voix | Très bien!

M. Fernand Etgen, Président | Merci villmools dem Här Sportsminister Georges Engel. D'Diskussioun ass elo ofgeschloss.

Mir kommen elo zur Ofstëmmung iwwert de Projet de loi 7956. Den Text steet am Document parlementaire 7956⁹.

Vote sur l'ensemble du projet de loi 7956 et dispense du second vote constitutionnel

D'Ofstëmmen fänkt un. Mir maachen de Vote par procuration. De Vott ass ofgeschloss.

De Projet de loi ass mat 60 Jo-Stëmmen eestëmmeg uegholl.

Résultat définitif après redressement : le projet de loi 7956 est adopté à l'unanimité des 59 votants.

Ont voté oui : Mmes Diane Adehm (par M. Jean-Marie Halsdorf), Nancy Arendt épouse Kemp (par M. Laurent Mosar), MM. Emile Eicher, Félix Eischen (par M. Max Hengel), Paul Galles, Léon Gloden, Jean-Marie Halsdorf, Mme Martine Hansen, MM. Max Hengel, Aly Kaes, Marc Lies, Mme Elisabeth Margue, M. Georges Mischo (par M. Jean-Paul Schaaf), Mme Octavie Modert (par M. Léon Gloden), MM. Laurent Mosar, Gilles Roth, Jean-Paul Schaaf, Marc Spautz, Serge Wilmes (par Mme Martine Hansen), Claude Wiseler et Michel Wolter ;

Mme Barbara Agostino, MM. Guy Arendt, André Bauler, Gilles Baum, Mme Simone Beissel, MM. Frank Colabianchi, Fernand Etgen, Gusty Graas, Mme Carole Hartmann, MM. Pim Knaff, Claude Lamberty et Mme Lydie Polfer (par M. Claude Lamberty) ;

Mme Simone Asselborn-Bintz, M. Dan Biancalana (par Mme Simone Asselborn-Bintz), Mmes Tess Burton, Francine Closener, M. Mars Di Bartolomeo, Mme Cécile Hemmen, M. Dan Kersch, Mme Lydia Mutsch et M. Carlo Weber ;

Mme Semiray Ahmedova (par M. Marc Hansen), M. François Benoy, Mmes Djuna Bernard, Stéphanie Empain, Chantal Gary, M. Marc Hansen, Mme Josée Lorsché, M. Charles Margue et Mme Jessie Thill ;

MM. Jeff Engelen, Fernand Kartheiser et Fred Keup ;

MM. Sven Clement et Marc Goergen ;

Mmes Myriam Cecchetti et Nathalie Oberweis ;

M. Roy Reding.

Freet d'Chamber d'Dispens vum zweete Vote constitutionnel?

(Assentiment)

Dann ass et esou decidéiert.

5. Question élargie n° 190 de M. Marc Spautz au sujet de l'évolution du taux de chômage

Mir kommen elo zur erweiterter Fro Nummer 190 vum Här Marc Spautz iwwert d'Évolutioun vum Chômagetaux. Den Auteur vun der Fro huet fënnef Minutten, fir seng Haaptfro an eventuell no der Äntwert vum Minister eng Zousazfro ze stellen, an dem Minister stinn zéng Minutten zou. Här Spautz, Dir hutt d'Wuert.

M. Marc Spautz (CSV) | Här President, léif Kollegeginnen a Kollegen, de Chômage ass hei zu Lëtzebuerg erëm bei 5 % ukomm. Wou mer elo eng laang Zäit fäerdegbruecht haten, dass de Chômage ënnert deene 5 % war, ass en am Mount Mee den Aussoe vum Statec no erëm bei 5 % ukomm.

(M. Mars Di Bartolomeo reprend la présidence.)

Mir hunn och dës Woch erlieft, datt e Betrib op eemol – ech wëll net soe mir näischt, dir näischt, well, Här President, Dir hutt d'Urgence net unerkannt vun der Fro – einfach gesot huet: „Mir halen op. Mir maachen zou.“ An do sti 50 Leit, déi net wëssen, wéi et weidergeet. An weinst deene Modeller an där Gefor, wann een alles liest, wat d'Patronatsorganisatiounen soen, stelle sech verschidde Secteure ëmmer erëm d'Fro: „Wéi geet et weider mam Aarbechtsmaart hei zu Lëtzebuerg?“

15.188 Leit waren op den 31. Mee 2023 bei der ADEM, fir eng Aarbecht ze froen. Et muss een awer wëssen – an dat gëtt oft bei deenen Zuele vergiess –: Bei deene 15.188 sinn der awer dann net 15.188, déi Chômage kréien, mee dat si 15.188 Leit, déi wëllen eng Plaz kréien. Well vun deenen, déi do indemnisé sinn,

dat sinn der 8.813. Dat ass d'Hallschent vun deenen, déi Chômage bezuelt kréien. Déi aner schaffen entweeder nach op enger Plaz oder sinn iwwer en anere Wee gaangen, wou se eng Demande wëlle maachen, fir op de Lëtzebuerger Aarbechtsmaart ze kommen.

Mir kréien alleguer, alle 60, déi mer heibanne sëtzen, all Mount vun der ..., iwwert de Courrier électronique déi Zuele matgedeelt. A bei deenen Zuele sinn och déi grouss Bléck ëmmer erkläert: wou déi meescht Demandé sinn, wou déi meescht Leit sinn, déi am Chômage sinn. An dofir géif et mech interesséieren, well ech dat weess ... An ech muss fairnesshalber soen – de Minister huet mer dat och nach eng Kéier signaliséiert –: Hien huet nach méi grouss a vill méi detailléiert Ventilatiounen zu deenen Zuelen. A genau wéi mäi Kolleg, de Kaesen Aly, hat ech emol d'Chance – oder wann een dat esou däreif nennen –, an der Zäit am Comité de conjuncture ze sinn. An am Comité de conjuncture, do sinn dann och ëmmer all déi Detailler komm, wou een da bis an de leschten Dibbelche wosst, a wat fir engem Secteur dat wier, oder et wosst een dann och meeschtens, wann een d'Zuele méi am Detail gekuckt hues, schonn den Numm vum Betrib, oui dass en dropstoung, well et konnt ee sech da soen, opgrond vun deenen Zuelen, déi do virloungen, wat fir eng Entwécklung dat wier.

Gläichzäitg stelle mer awer och fest – ausser deem, wat ech gesot hu vun de Chômagezuelen u sech –, dass och ëmmer manner Postes vacants genannt ginn. An awer och gläichzäitg héiere mer d'Reklamatioun: „Mir hunn net genuch qualifizéiert Personal, fir d'Posten all ze besetzen.“ Dat an engem ganz grouse Beräich, iwwert dee mer schonn oft heibannen diskutéiert hunn: am Santésberäich, mee awer och ëmmer méi an technesche Beruffer, wou mer déi Qualifikatiounen net fanne bei de Leit, déi mer brauche fir déi Lëtzebuerger Economie an déi de Lëtzebuerger Serviceberäich och brauch, fir kënnen ze existéieren.

An haut de Moien, wéi mer erwächt sinn, hu mer eng Nouvelle kritt vum Statec, wéi vill Milliarden hei zu Lëtzebuerg verdéngt gi vun eise Grenzgängerkollegen. Ech hätt och léiwéier gehat, se hätten hannendru gesot, wéi vill awer och d'Frontalieren derzou bädroen, dass d'Lëtzebuerger Economie dréit. Well wann een nëmme seet: „Déi kréien esou vill Suen“, da seet een net hannendrop, wat déi awer och derzou bädroen, dass d'Lëtzebuerger Economie kann dréien. A wann een d'Zuele kuckt, sinn et 227.000 Frontaliere bei engem Emploi vu 483.000. A wann ech dann nach richtig rechne kann an der Reegeldetri, fir dat dann alles opzehuelen, da misste mer 22 Stonnen den Dag schaffen, wa mer géifen zu hinne soen, se sollen doheemleiw – fir dass een dat dann och gesot hätt. Ech hätt dat besser fonnt, wéi dass een nëmmen déi plakeg Zuel bréngt: „Dat do verdéngt se an dovou geet d'Hallschent a Frankräich an déi aner Hallschent, déi deele sech Däitschland an d'Belsch.“ Ech hätt dat besser fonnt, well dat och heiansdo e Goût amer bei verschidde Leit hannerléisst, déi net wëssen an net iwwerleeën, wat do mat hannendru steet.

A meng Fro un de Minister ass: Wat huet d'Regierung wëllen, fir am Detail ...? Oder: Kann de Minister eis nach méi detailléiert Chiffere soe bei deene jeeeweilige Secteuren? A wat plangt d'Regierung vu Formatiouns-moosname fir déi Leit, déi um Aarbechtsmaart sinn? Mir wësse jo, dass an der ADEM verschidde Pläng bestinn. Mir wëssen, dass mer eng Solidareconomie hunn, déi eng ganz grouss Aarbecht mécht, déi och ganz vill Leit opfänkt. Wat kënnen mer do nach maachen, a) fir awer och de Leit déi néideg Formatioun ze ginn, fir dass se awer och um Aarbechtsmaart kënnen bestoen? A wann ech dat soen, dat wëssen och d'Kollegen aus der Travailskommissioun an de fréiere